

四庫全書

集部

欽定四庫全書

集部

甬上耆舊詩卷十八

詳校官右中允_臣薩敏

主事銜_臣徐以坤覆勘

總校官麻吉士_臣朱銜

校對官編修_臣盧遂

謄錄監生_臣周克鵬

欽定四庫全書

甬上耆舊詩卷十八

監察御史胡文學編

太保余文敏公有丁

公字丙仲為諸生家貧然營葬其父地使前可列碑
亭石馬植數萬松既得地在同谷因號同麓子嘉靖
壬戌中進士與吳門申公婁江王公廷對俱一甲三
人並入相前此所未有也在詞林每值制草曰奈何

以王言佞人且私其賄辱國莫甚焉因謝客不納一物初公童時嘗遊崑山求執經于震川歸先生之門先生屏不許至是公充會試同考手一卷曰是必歸先生文也失吾不收歸先生者車上矣及發卷果歸先生海內文章為之一變歷遷吏部左侍郎掌詹事府江陵新歿以禮部尚書兼大學士入閣辦事公枋國在重臣當軸後意在休息之浙兵為亂少司馬張公出撫浙造公問計公曰此窮獸也不善處之且致

死中州徐景星為人有機略舊領此軍今失職待事
薊門但挾其人以往即指揮可定矣浙中竟平及江
陵事敗論者猶搜剔不已至有摘舜禹之事以搖上
心太宰楊公持不可言者謹然閣臣亦俱引去公獨
入直密疏曰言官可任孰與諸大臣今以一言官故
而使諸大臣求罷非盛世事唯陛下降手札慰留以
示殷勤使大臣得安庶人心定國事明也上即從公
言人謂此回天力也未幾以疾卒于京邸入相不及

三年公素達生有高世之志喜訪故鄉佳山水所居
一日必使亭館脩整樹植蒔灌俱得其宜初以南學
士乞假歸里買山東湖中薙草得一古洞口以杖叩
之音鏗然為爇火入洞則訝然乳四垂千年伏翼觸
烟而出乃披道抗丘為湖居更依洞門築一臺受湖
光澹蕩時泛小舟往來起白鷗莊在水口每四方名
士至輒相延接與極游湖山佳處既載肴觴兼攜絲
竹唱咏傳一時江左風流自許謝安王儉至今臺基

榭址尚有存者追溯盛游蓋不勝今昔之歎焉

望岱

岱山望不極望望雨中滅雲送近山來風吹微雨歇前
村樹若薺遠溆洲如月林花紅欲然澗草香逾烈蝶翻
閒過慢鳥鳴偏近轍旁矚萬象妍遐視千里豁何異樂
游原矧乃清和節不憚衝泥行冷然清興發寄辭宦游
人隨地可怡悅

偶述

嗟余負幽癖思凌九州外一朝向中山風吹女蘿帶以
此激孤懷喟然志彌邁况乃陽春滋韶光徧巖瀨湖波
明樹間石色含烟媚開尊近魚鳥賞以崇深會拊化契
冥詮孤往復奚礙抗手謝故交飄然脫塵籟

五日曉霽山行

早出驛東門仰見朝日暎瞳矐初旭忽明滅四山尚帶
雨餘痕草際烟浮濕不見亂雲已散俄復屯堤邊弱柳
低不舉沙上輕鷗飛乍翻劃然風迴霽色開山勢迴合

來如奔絲來山靈為我邀芝駕故遣雨師灑潤清郊原
不者昨晴今却雨儵忽之間變朝昏明晨日觀峯頭宿
將披若木探天根

予在告李孝父枉顧

半月疲朝謁深慙侍從年悔非知己少愚肯受人憐司
馬貧為病愁生懶自便歸家無不可猶喜及春前

阻風黃河寄柴方伯

黃河愁欲破落日亂啼鴉岸折疑無路春深不見花塵

沙迷賈道草色没人家北望長安處那堪老歲華

兗州逢游使君

沫水接天平回舟兩日程
茆茨周俗舊邑里禹王名
天遠低垂野沙明曲抱城
宦游真足適到處有逢迎

送張峒峽

客行新霽後曙色啟城頭
曉徑穿雲濕春塘帶雨流
江離牽客思山鳥喚春愁
底事新芳歇王孫不可留

城南泛舟

躡屩城南出人疑谷口耕川原隨坐得雲日並舟行世
事看羅雀幽懷屬聽鶯會當投白社此地學無生

途中

春日褰衣問翠微春郊無地不芳菲梨花雪濕白欲碎
草色雨餘青乍肥天末烟霞引前旆道傍蘿薜上初衣
翛然頓愜區中賞此日抽簪願不違

別湖莊

年來屏跡大湖濱共說先生隱是真此日忽隨青雀舫

逢人不製白綸巾
烟霞應解牽行騎
猿鶴終能遲主人
無奈驪駒催物役
野心仍自戀湖春

舟中懷張李二山人

歸山半載又辭山
小桂茸茸不可攀
欲伴漁樵今未得
相從麋鹿爾何閒
天涯蹤跡飛蓬外
歲暮陰陽過鳥間
倚櫂不言思往事
傷心容易二毛斑

即事

夜分綾被春寒重
曉際花磚日影無
通籍未嘗闕請謁

上書何必乞江湖聖朝無闕堪焚草清署何妨獨據梧
騎馬人誰題尺牘閉門吾欲著潛夫

太師沈文恭公一貫

公字肩吾別號蛟門隆慶戊辰進士選翰林庶吉士
授編修歷官掌詹事府禮部尚書遂入直東閣累加
少師左柱國吏部尚書中極殿大學士凡入相十有
二年為首相八年年七十賜老歸里家居復九年卒
贈太傅諡文恭公建儲功諸相業俱載國史不具詳

臧氏曰戊辰史館大拜者七人以詞章擅名者東阿
鄆縣為最東阿之學殖優于鄆縣鄆縣之才筆秀于
東阿余嘗讀公全集為溯其所本蓋公少與余君房
同研席族父嘉則先生名最重公嚴事之稱為句章
公嘗曰吾學文于君房學詩于句章公門中指授同
學切劘俱深得其傳而公詩更為獨絕蓋公才實過
于君房故不煩句模字索勞其意匠而蒼然作古遂
直揜農丈人設以公之才解其詰曲導之蘇暢如良

馬下峻坂而緩轡中衢一何樂也惜夫其僅于農文
人也若嘉則之詩渾涵博麗吐納古今公才既與相
當而更能出奇于其間嘉則如大山長河而公益以
崩崖飛瀑嘉則如茂林脩竹而公益以奇松異草故
其所造幾出于藍至公一生學問及歷年相業讀其
詩輒放恚見之每當老氣橫厲顧盼自奇斯誠魁然
一世之豪也前輩謂如幽燕老將氣味沈雄足冠詞
家之首此可與論詩矣

將進酒

丈人解嚴顏四座且勿喧生不逢王子期一日難知何
稱百年填胃磊落如丘山不飲安得游神仙羅珍瀉玉
聊自憐大罌小甌翻踏天天有酒旗地酒泉虛蒙其聲
人尚傳桂精一月不兩圓白駒行地不可牽去歡居憂
生實憐

君馬黃

君馬黃我馬蒼游龍尚不顧飛鴻飛兔何言良神龍失

雲如跛牂騰蛇委霧鱗角亡請從櫪下居無厭糟與糠
有所思

妾亦有所思君亦有所思妾思在地終不移君思如天
安可知雁往燕來接栖江湄寄書零陵還謝主人誰能
長伉儷誰能長鬱陶白日不回照焚心擲山椒

長歌行

肥豕不如瘠牛貴官不如富蓄少病不如老健生勞不
如死休悲歌乎斗酒不澆百憂短日不給長愁胡不歸

來海頭東日正照蓬丘

擬秋胡行

物情無象物初懸可知物情無象物初懸可知賢人逢
殃將德猶虧嵇公雖仙柳惠吾師人間難工天上易居
歌以言之物初懸可知

天地皆實人處空虛中天地皆實人處空虛中實下為
土實上為風間風間土呼為壘空動而有神變化無窮
歌以詠之人處空虛中

謂柔非沈謂柔非昏昏謂柔非沈謂柔非昏昏非脂非
韋莫然無魂不驚一羽不飛片塵欲平躁息渾渾沌沌
歌以詠之謂柔非昏昏

王可交

餘杭母酒壺公藥賣藥買酒自斟酌四明山心去復來
一往逍遙竟何託當年漾舟趙村好青玉案前粟如棗
黃衣送我落青天瀑布當門坐秋草三月三日九月九
一日辭家家在否今來又是幾春秋直得先生幾杯酒

隴頭水

秋風揚白沙夕露生寒芒
鳴鳩化為鷹結束從軍行
天地判區夏一水猶分張
嗟我異域人何年共衣裳
搗雪團作糝滿腹冰與霜
已對隴頭水誓言死異鄉

塞下曲

長劔夜生光照耀
兜鍪明鼓鞞一傳響
上馬如流星萬人皆敗死
一身何用生平時
訣妻子此日殉弟兄
嗟嗟幽并兒白髮難得盈

閨思二首

不省蘼蕪草，惟看豆蔻花。
歡歸白門外，猶自夢天涯。
四月梅子生，莫打青丸碎。
五月雨中熟，與歡共滋味。

古別離

雙魚渡江來，聞君在江都。
乃怨山川長，能令歲月殊。
君處寒梅開，妾處啼鷓鴣。
一語纔相聞，數月為須臾。
向來綺窗下，一唾真一珠。

白頭吟

兔絲附青松，松高絲亦長。何意秋風來，委蔓隨飛霜。海
行無信風，春行無信時。瑤軫曾悞人，勿復欺新知。君
以紅顏期我，以白頭有夫。莫令客客心，不可柔。

相逢長安陌行

少為園林主，老作園林客。積塵暗成丘，積時暗成昔。別
君穆陵橋，逢君長安陌。星霜形貌苦，陵谷姓名易。故山
虎牙紅，世事烏頭白。長缺何所彈，短歌竟誰得。春耕不
及南，秋戍翻投北。隣女怨寒機，健兒摧暮笛。豈無他人

憐終乏扶搖力積雨懸枯燈巖霜踏穿屐貧交顏自冷
賤語意空寂壚頭值羽人為余論雲石莪藿不得充何
能待靈液

貧女行

三年成一葛五年成一絲絲比白玉纚葛比黃金縷何
乃貴如此縷縷手自治服登君子堂六親競來窺不道
新人醜盡道田家宜日入歸曲房拂拭架高梳通宵熟
藜火手疊成四規床頭文竹筐匙管常相離自非歲時

屬不識陽春姿寧為篋中陳忍作身上緇室中復長女
行當治歸資短線綻故縫顏色不改渝家貧無織維持
此申佩褱方領曳長袖濶略無所施須憐辛苦作勿嗔
時樣非如母藏十載時來未可知

嚴子陵

漢帝思故人迢遙夢明月清晨題十行五道使車發卧
邸呼不起攬車嗟咄咄偃蹇中宵足留連舊時舌客星
猶在天肯為曹官屈至今七里灘潺湲足怡悅所以馬

伏波一見真主決投彼交讓冠樂來就簡脫古道信濶
達難為後人說

雜詩

吾聞軒轅帝膝行上空同一當廣成子與物遊無終至
陽奮黃墟至陰出玄宮變化超象外晴天飛玉龍萬靈
朝甘泉一往空後宮已無首山金但聞烏號弓精英不
可扳髻髻如夢中

止水鑑毫髮流水迷圓方稚齒識幾先病骨知暄涼谷

虛響乃滿天寒月有芒靜虛道之極至柔化為剛君平
有明誠強人不為王

晨凌地肺頂高歌露晞曲人生有去來此曲無離續少
殤人所憐老歸子亦哭老少既同哀脩短亦齊促豈知
蛇憐夔一足吾亦足

太虛騰圓暉扶桑晰初日炘炘露海竇赤霄坐相燭九
闕忽啟籥衆星曠不屬是時穉春啟輕寒散中谷黃鵠
何所挾雙翅兩寒玉萬靈朝昧爽駘蕩復何欲

蒿目憂世資置身鼎鑊中鼎鑊未及然豈不膏微躬位
高衆所指一雀隨千弓不能早決起徘徊弄春風彈石
已在身啾啾哀鳴空達當威鳳翔窮當逝冥鴻粗糲足
再餐人生樂已豐此外皆其餘何用勤若翁

渡江似春來十月烏能巧雨收客帆起日出潮聲早釣
絲浮曙烟樵歌落天表新花紅欲綴故葉青未槁何哉
此方春去遲至偏早所以四海心獨夢江臯好

卓哉揚王孫裸葬良不惡造化生我時安得袴襦著混

沌為我衣青夫為我幕誰非塊然生豈論毛與蘘誰非
寐然死豈論溝與壑南山未為銅陳絮何用斲如彼唾
與涕一落便永落湯湯濁河流空聞嘆銅雀

出門

上堂別父母下堂別昆季回首妻與女驀然拂征袂拙
耕力不任巧求智所蔽持我獨用心何方不凝滯嚴霜
被永野天秋朔風厲草稀候蟲蟄江夕哀鴻逝海上百
愁積天邊一身細烟帆宿暮雨霜鐘發曉霽歷覽雖可

樂不如守根蒂稻梁足吾謀匏瓜豈慙繫

集卞茂卿園

新雷動土脈熙陽悅草性池柳已解窺江梅已堪贈畫
舟蘸晴波文茵坐幽徑芳辰生遠思微雲澹孤興藥標
新春奇竹藏隔年淨禽鳥初辭寒闕闕語相慶經時守
太玄清齋一元命何來歲華情乃知春感盛酒闌送明
月林臯自深靜

成甫示游西山詩奉酬

幾人到西山不見西山趣車殆馬復煩但見西山樹道
人廢機心舉足白雲驚飛步送高雁決皆破沈霧刹多
境屢陳春去僧自住臨流照兩眸吾我忽焉遇顧見黃
金人仰慙白日誤高歌林樾表天籟非小賦靜者自有
真豈須聾耳寤一室吾所專神往不在屢烟霞枕上得
丘壑胃中故君游洵云美吾觀幸忘諭京洛雖多塵終
不染緇素

偶作

陶公偶然歌為求三徑資到官八十日輒賦歸來詞五
斗尚不顧一物寧肯持種秫三百畝飲者知為誰田園
有松菊桑麻雜然滋醉卧瓷甃間彘彘鹿與麋身將五
柳隱心與孤雲期許由不買山巢父不鑿池到處即吾
處故為隱者師但逢佳山水感荷主人貽能同遠公飲
忍向王弘辭

四明山

余愛四明山遂忘千金誠
愛費與日往巉絕甘行憊大

闌轡可騁箭，廣僕無賴黎。洲與丹山尚，隔流焱外醉舞。
清冷天嘯歌，白雲界疑無。后土承獨有，皇天戴驚峯。激
俯漚巨海，紫近紉山院。罷鐘磬時禽，喧梵咀緬懷。秋水
人耿襲清風，介戾止亦忘。歸歸來，思難再。

遊它山

南山暖氣偏，九月猶積翠。以我烟壑心，觸目皆可意。天
清歸鳥肅，溪白游魚避。雲根上枯水，石衣蔽古寺。危巖
可捫井，怪石每驚魅。不緣前山歸，偶與來徑值。歡賞有

羣彥情景信雙媚
明月引歸槩烟霞尚生思

雜詩

凌晨趨嚴朝
東日射馬首
冠蓋滿道周
相逢多執友
君子策高步
小人亦顏厚
奪我麋鹿心
聊備牛馬走
漢史蔡邕筆
能慚微祿否
嘗疑茲事外
更須謀不朽

贈別周民部元孚

不厭朝與市
誰能逆林藪
不厭魚與肉
誰能甘薤韭
久病諳良藥
長離憶初婦
生無騰化術
意勝雲山友
吾觀

遽伯玉卷舒一何有寄迹周行間而心結巖阜莫莫古
今道亭亭往來柳心傾車馬前目成金石後逡巡撫徒
御顧瞻別我久蘭蓀藝深谷臨風闕馨不

送范汝益

雲鳥無違翼波魚無乖鱗一入臺沼間飛遊從主人莽
莽白日高悠悠風與塵駟車杳何許長鞭炎海湄海湄
未云遠猶此籠中馴鼓翼觸四隅長鳴負三春洪覆迴
九州達生識其真勿言霜霰始日月無停輪何必胡與

越然後為參辰結交十四年與子同一身飛鴻漸于干
幅憶不可陳願子保明德萬里猶比隣

朱顏曲

朱顏非自換良為篋鏡欺篋鏡終不發朱顏終不移歌
罷月在梁影落闌干垂感君明月心不棄秋風姿猶記
覆耳髮挂君飄纓髭宛轉結不解煩君立移時

偶成

催耕盛殷勤委黍特狼戾婦愚信無知鼠老亦當計有

口不自營寧識謀年歲周鼎鑄馬履留以贍陽燧

委黍鼠婦

也
訴寃大覺前笑破黃金口今昨無是非是非日生有養
交獵浮名是名不能久息交謝浮名是名亦名否堯舜
讓天下燕噲從之醜老子與韓非一傳相尾首

杞人豈其愚天墜亦時有或言天無墜有墜墜當久或
言數苟及死亡十而九相牽入黃墟誰復論好醜眼見
女媧氏煉石補柱朽

贈金伯庚

問君何所挾喜氣常津津散帙理幽尚齋心舍道真雲
駛月華淡江空風色勻雖無朋知來亦有杯杓親少與
鶴背期老得鷗性馴秦隋自來去長稱羲皇民

神力

朔方有神力潛與玄冥通小敵怯于雞大敵奔神龍繞
身青赤蛇珥踐四白虹當其馬頭處開闢無秋蓬不見
眼際雲但聞耳後風膽包七尺外精入三光中左右殪

貙虎奔馳竟磨蟲萬方平一律四時銷五戎韜光淡流
水第稱寶劔功何必麒麟畫市廛喧兒童但慙地上老
逍遙游無終

新婦

種禾取其穡種樹取其植一日為新婦入門耀容飾三
日為主婦上堂撰飲食從此卷長襦當窗事機織貧富
皆有營埽除亦乃職將諧舅姑心欲寬夫壻責六親乃
來誇汝家得婦力寧論東西施澹然並無色

歸歟詞

三家不可仕九夷寧足居天意不在東聖圖將安如海
桴馳遠情鳳哀想皇初載勢有濩落驅輪竟蕭疎暮春
二三子一笑欣歸歟

魯女居東隣白髮不嫁人投以雙玉環澹如秋月新匪
石安可轉貞心難縑磷不覩桃花源棄余如參辰風吹
玉笛來萬籟高青旻蓬萊亦不遠欲往無良因

苦熱

夏日空自長日長翻損功揮扇猶軟怯何云治倥偬夏
夜亦豈短遠床行不窮瀉海入漏孔淵然潛燭龍晝既
衆蠅蚋夜仍紛糜蟲共張利爪吻攢嚙無瑕躬嗟爾最
纖廉慘于虎豹雄揮之既不去薰之詎能空欲往訴帝
宰閭闔屯金風將逃山澤深迢遙絕冥鴻是誰居爾徒
據時氣如虹煽彼萬方赤烹人九鼎紅甘露何年漿水
晶何處宮濕天委長淚寫恨增熱中惟藉一杯酒微吟
以從容

無題

仙人吹斷紫瑤竹黃鶴偏巢夜深宿銀漢無聲秋漏長
寸寸心明剪紅燭青銅飛去孤鸞影化作冰輪兔心冷
傳得嫦娥不死方應種人間桂千頃

長安行

乙丑
歲作

長安九衢平似席甲第紛紛五侯宅繚繞香塵飛紫雲
喧豗畫轂馳春色朱門繡戶搖青槐翠幕紅絲颺舞臺
鳩鵲觀前驚鵲起濯龍門外騎龍來韓嫣副車絕馳道

張放單鞭逗歸鳥金吾擁衛巷無人丞相迴軒跡如掃
一生讀書不識丁只解吹簫與弄笙昨夜推開木門出
今朝又向章臺行章臺柳色如青玉夜夜花前剪明燭
臨淄麗女可憐聲鎮西歌童妙意曲并肩錦袖同心襦
合歡寶扇連理杯杯中只嫌天地窄扇底直使神仙迷
綠幘廬兒堪炙手青衣小郎慣使酒天寒海氣薄西山
日短雲光銷北斗黃門鉤盾空邀遮御府金錢半在家
鄧氏銅山賤越馬郭家金穴欺隋蛇自言奏有回天力

又道功多絕地脈摧盡南山樂未央翻殘北海人如昔
寧知天地一朝開寧知星漢還昭回麻紙半行變顏色
藁街十步生塵埃賓客聞聲皆走匿妻孥相對唯號哀
古來白鶴與黃犬專待豪奢公子來何如蓑笠紫泥坂
獨舉青山蓮葉杯縱非上古莫靈樹也是蒙莊樗櫟材

楚宮曲

楚山十二芙蓉開一山獨秀高陽臺渚宮爛漫百花發
誰向君王夢裏來君王樓閣藏青春一門一戶一美人

浣沙妖姬失顏色凌波仙子收光塵安能一一承歡悅
好醜只與監宮說可憐柘枝細欲斷新裁舞袖郎當濶
魚脂照夜不得明不論顏色但論聲聲聲亂入君王耳
總付西風菰葉鳴

苦寒行二首

虬壺夜冰鼓吏死苦霧壓日日不起絳宮悔拜玄英侯
蝸縮蛻蟠滿床水窮竒守人無晦朔門外誰能開剥啄
獨有袁家揜戶深墮瓦飄廊渾不覺

南方苦熱北苦寒燭龍近失天公歡瘡膚皸肌誰恡得
后土迸裂百餘尺長風數陣刮地起一點青藜照書几
誰將片言稍作溫獨有寸心寒似水君不見駝裘染火
四角燔酒杯落手紅霞翻燕歌趙舞聲方喧從奴欲歸
誰敢言嚴鞞四蹄立向門

侏儒行

身比侏儒長六尺俸粟一囊錢二百長飢短飽各欲死
只合中庸老通籍君不見東籬槿朝日暉暉暮飛盡莫

道羊珠可療飢若逢龍寤當蒸粉

雙燕離

雙燕尾涎涎銜泥銜草雲中見百花潭上平蕪香絲絲
剪破青天練何物春風不相守不及蘭塘一回首雄去
飄飄雌獨還沙昏雲黑無青山長年結巢半不滿捲簾
待月湘痕斑湘痕斑兮竹不萎燕雛叫閣鳳皇喜

風木歌

憂來中心不可除海乾河枯水失魚冠纓不足帶有餘

耳目非故山川殊憂來中心不可絕蟾蜍食盡瓊華月
取我衣冠而褚之杜鵑夜夜啼腥血夜夜復朝朝乾坤
遙復遙水澌雷滅香缸炮慈母何人諡為妣走向空閨
問前語不待吾生待吾死死如有知尚相持死如無知
長已矣

卜居行

冥冥深林不可居白日猛虎嗥山隅往來僦僦投人嬉
胡不拂衣歸來乎涉江休誇舟楫牢涉世休誇方術高

鸞皇孔鳳日以遠畜臬鳴鵙爭喧囂白頭仙人玉鬟女
分明共我南窗語空同路近行不難蓬瀛水淺堪輕舉
三珠樹底紫鸞遊五色芝中白鹿呦玉堂金馬已可識
何不歸來空白頭我謂仙人之語亦難信天上尊官安
可近雲襟霧幄堪徘徊胡為謫向人間來桃子不因方
叔結桃花豈為劉郎開最愁一釣六鰲盡圓方漂泊令
人哀

秋水篇

秋水灌百川不辨牛與馬河伯欣然為大觀海若視之
直土苴達人逍遙無不可何為為此栖栖者鴻鵠遵江
湖志在青雲端鳳皇戢深林一舉天門寒魯連談笑褫
秦帝掉歌不顧千金歡朱公一出吳王死扁舟五湖天
地寬丈夫之性本骯髒一龍一蛇唯所向意氣若殷勤
此心可贈君嘗思叩九閤不然死三軍蹉跎歲月不稱
意年來玩弄西山雲

與鄔汝翼勸酒歌

青袍白馬登君堂
盈盈美目誰家郎
燈火如山夜色好
試歌一曲柔人腸
古人不飲今人酒
酒到君前莫揮手
朝來停車問姓名
已知君是人中英
英雄不死即不窮
生當謁帝明光宮
不然羽翼凌天風
安能沾沾守尺寸
虛此少年之青銅
高門邃閣不可謁
翠管朱絃此時發
客舍靡蕪若亂雲
官湖茁茁如明月
世間萬事轉燭來
前年海棠今不開
夷齊跖躄皆已矣
何如共飲花前杯
恐君一行去為吏
僕夫在前馬在轡
空教滿腹流饒涎

欲飲不得下車醉茱萸灣
薔薇溝到處月明船上樓
清歌一曲碧雲盡歸去
長江天際流

送陸無從

楚雲釀雨東風急瘦馬江城共愁入
江南詞賦子山哀
海上別離李陵泣天地生人貧賤多
江頭落日如顏波
一飛九萬乃虛語百年四十今蹉跎
吾觀世人今瑣瑣
似爾文章寧坎壈貧賤如海人如舟
飄飄所之無不可
君不見東隣富兒耐把錢跬步不發
雙戶堅又不見西

隣孺子偶竊位纏索嬰身更憔悴不如貧賤坐自驕痒
可得搔痒可搔興來五嶽恣游遨飢來乞食亦逍遙無
論伊尹困鼎調無論太公窮鼓刀即如伯鸞死吳市香
名何損于二豪男兒貧賤何憂勞

炎海行贈吳明卿還高州

祝融朝駕北戶開湯池煮日天半摧綠烟朱熨平海出
陽侯羸行迷相失蛇珠化雨翡翠雲天龍九首腰紫纁
孤鳳叫月月不語妖靄變黷紛向君四時總是皇天氣

平分不到炎荒地深院梧桐碧甃間不許長轅暫時繫
高涼主人笑拍手白雪題軒夢前牖冰絃續續三尺聲
一片浮雲掌上生

女貞樹為馮節婦

女貞樹鬱哉何蔥青巖霜墮地白日沒寒枝半抱秋風
生雲黝黝石齶齶雲夜愁石朝語生與為墓上木死與
為墓下土鬼車勿啼猛虎怒原上新條吾有主化為青
虬帝閭去入帝閭緼繁絃一曲湘妃魂隨風落人間聞

者噉噓再三歎鬱哉女貞樹何如桃李顏

晨行歌

明星尚低天未明凍日潛從海底升夜如何其起蓐食
開門車馬喧喧行人生貴賤皆有職蹇蹄請勿辭前征
投簪未必玄髮生解綬未必肘腋輕不向山田事耦耕
便從牧豎披榛荆陸沈吏隱亦不惡長飢短飽何須評
天寒日駛晝難給不加夙暮誰其營君不見南箕北斗
相縱橫東烏西兔日夜爭警露之鶴不停唳失晨之雞

亦補鳴但無陰霾暗往路縱有冰雪皆夷平富平里第
無鼉更城烏不敢朝墮聲侍兒密覆將寒錦僕子謹護
初調鶯不向紗窗看曉色安知門外輪蹄情

送吳山人之天台

吳中年少今吳君睢盱不揖風塵人負圖擔簦常獨往
布袍如雪時時新來窺禹穴藏書處又向蓬山望烟霧
手持白筆搖青天貝闕瓊樓入詞賦海雲扶身身更輕
海水洗眼眼更清聳身靈颺白日舉靈颺墮處霞為城

霞城高標天影空石梁秋色人如蓬山僧若肯乞人住
為余灑埽雲中峯

再游上方寺與故人飲別

我來上方十載前桃花嬌殺春風憐酒尊清于蜀井泉
彈絲品竹集四筵我來上方十載後秋霜白盡門前柳
當年故人不半席杯中白髮多于酒故人故人復故人
何為日夜翻作新感此令人腸欲斷蕪城之賦增酸辛
博山爐中爇沈水琪花片片微風起山花為我隨意綠

山鳥從渠盡情語
隋帝宮前酒旆多
吳公臺下生寒波
生憎紫燕辭條去
尚有流鶯斷續歌
長年且勿解維開
再與諸君覆幾杯
看余功成揖人主
雙期赤松黃石來
不學麻姑典仙職
三淺海波方一回

老鷄行

相州浮屠滅素雲
佛徒四散靈光分
有狐綏綏窟其頂
據危布巧張魔軍
公然出入索祭賽
移精屋底驚釵裙
幾村月下捲眠席
驅桃鞭棘喧相聞
平原公子攬游騎

意氣西來照天地翩翩從者五陵豪手拍青松暫留憩
聞茲肝腸裂秋色虎豹縱橫誰耐得回看鞵上老愁胡
好去清霜試風力愁胡整束儘從容竦身三躍生剛風
老狐負嶠正眼空老鷹深目復自雄不期側翅偶失便
霜毛醉舞桃花紅道旁觀者色如土公子生蒙隴西恥
難忘一戰雪曹柯詎惜千金求郭隗詰朝載取老鷄來
金眸鐵脛非凡才一蹴四天聲翩翩愁雲慘淡為之開
心知敵手不易摧交綏便作旋風回長鳴飄然向空去

狂魑笑破呼鷹臺不堪一辱還再辱三斷金鞭仰天哭
江花片片自飛來江鳥不飛皆掩目忽聞羣鴉繞相輪
如泣如弔聲啗啗老狐失驚小狐哭迷離欲竄無荒榛
未解天公意何者萬人欲去仍旋馬東方一道如飛龍
無數竒毛蔽天下橫排鷲鶴吹威粟殺聲欲震長平瓦
健翮當前索狐戰羣握飛沙爭撲面風塵入眼青天昏
霹靂一聲滄海變自餘小怪無煩誅攢頭亂啄充朝脯
但聞腥風萬縷汗遺腸儘足餐飢鳥心感主人再三呼

激烈綢繆當報珠吾觀此鷄智勇俱不數博浪沙中鉅
似曾親授黃公符吁嗟鳥中之丈夫鳥有丈夫人則無

放歌行

古人貴清貧今人貴邪羸夜蛾赴烈火不悟飛鴻情飛
鴻逝雲端一去如跳丸誰能攀其翼百鳥方心寒憂從
中心來外物安能寬鷓鴣拾瑤草衆芳收其歡我今放
歌君試聽天地為余總愁病東隣瑤軫既有情西海明
珠豈無脛何處脩篁不受炎何處貞松自然勁繞朝敢

謂秦無人樂毅遂稱臣不佞淒雲已墮中庭陰促織空
為牀下吟穉生醴酒我當去季布髡鉗君自任願以不
肖軀長托無為國生為白日光死作青山色清泉可以
入叵羅紅蕖不劣于嬌娥竹葉飲時桃葉勸柘枝舞處
柳枝歌白眼向天天不怒悠悠萬事如予何

送臨淮侯李惟寅守南都

君侯岐陽王子孫家之哲嗣國寶臣黃符三略世所授
素業一家心更親雙霓夜渡石頭渚佩刀躍出作人語

試看遠近桑麻中盡是先王血駒所昔年組練留殘紅
此日歌謠落照中分命保釐黃紙重古來周召並稱公

金臺懷古

燕臺昔日亡薊丘燕郊駿馬無人收一朝買得黃金骨
臺前萬騎皆驂騮古來君臣不易得老死英雄難物色
眼前忘却樂毅功後世安知郭生力九日易水蕭蕭寒
行人褰裳欲渡難一時羽聲盡銷歇猶有怒髮能衝冠
至今都人好奇節白日街心落紅雪可憐昭王墓上樹

一輪光彩懸明月

四明山歌

我昔長歌天姥吟今來飛越江之深烟波浩蕩都在眼
蒼厓白鹿紛可尋游足未開意已窘片雲隱約前村盡
適來縱入丹山赤水之洞天果爾三百八十芙蓉之峰
相鈎連沸如巨浪排九淵渴虬飢鯉崩奔泉驚魂褫魄
悸不定乃知世間安得無神仙際天但有淺黛色到頂
猶窮羽人翼謝公萬夫鑿不得支遁欲度空嘆息黃熊

近人白虎怒杜鵑半染松花碧青鞵屨穿幾悔來眼前
可即仍徘徊俄聞竹間響茶臼寺門正對雙眉開草根
敲冰持滌釜纖陰近送靈湫雨劉綱臺榭收紫綃王交
瀑布懸青組二韭三菁宛可拾東烏西兔紛來舞篆烟
雕霧無時休一雙白鶴飛何苦吁嗟乎劉郎誤入青山
圍不是忘歸不得歸薜荔滿牆皆可衣胡麻滿谷何愁
飢赤雲層層團白日任他渡口桃花飛百年三萬六千
日古今賢聖皆永畢何為容易別青山空教青山笑不

還誅茆結屋弄流水溪雲與我長潺湲

江頭春

江南春風麗如綺十萬人家種桃李鶯聲巧弄管絃新
燕子平行一江水當時喚汝作玉人悔不喚作江頭春
江頭春會年年到玉人何處流光塵

日出入金閭門行寄友

日出入金閭門朝隨明星暮紫雲素食經秋亦何意素
心空自生氤氳羣英繞轂不得前白髮蕭蕭蒙少年當

關者誰奮怒言何以處我山之巔可憐神龍不見日滿
身烟霧相隨出可憐堯舜不見人龍車遙遙度紫旻康
衢之家難上闈土階三尺深重闈相如肺病猶著書子
雲天祿寥寥居西山白雲謝逋客故園叢桂今何如

日出入金門行

昨暮日入我當出今朝日出我當入日出入兮無停輪
我亦孤征向人急鞦韆雙履翻數千天街磨成寶鏡鮮
念欲且息不得息兩胥掖我高于肩汝飢不能倩我飽

汝亦劬勞堪自保世間到處有羊腸何必唏噓歌蜀道
當時只恨隔重閣不道重閣尚有門玉皇高拱蓬萊殿
一水盈盈碧海尊

楚宮詞

可憐楚宮人空抱長飢老揚妃齒齧玉魚鮮衛娘鬢薄
金鸞小不逢一日春風吹何似村中薺花好鴟鴞難為
鳳皇舞夜深空洒霓裳雨悔不早嫁前村兒絲索牽牛

打村鼓

過故相長沙李公門

長安城中多息壤九衢歲月紛來往當年高門今矮屋
石刻狡狴坐深谷幾回偃僂始到門幾樹公槐尚垂綠
長沙公今安在海有滄田陸有海是時白龍常遠游四
海晏然朝委裘羣公方睦足嘯傲懷麓堂前操大浮我
來寒色照晴光九衢積雪如羣羊盤旋路繞千迴腸乃
知太行之險不在遠如弦之直死道旁古來三讓原不
易我今難于一辭去安得中山黃鵠舉續翻下作空中

絮採芝採苓須黑頭課耕課織足自謀如何靡費不貲
粟未解蒼生一日憂

送金伯庚還山

槭槭西風生柳條送君入山尋藥苗藥苗已枯實正飽
長鏡短鑊憑君操山中人流光無情白日新白日不照
臣心絕高山巖嶭石礪裂黃鳥高舉青猿呼搔頭負痛
看茱萸短歌行夜半欵枕夢不成寶劍半蝕無號聲牛
斗之間藏至精斗酒送君君便行

早秋送人北上

蘆葉壯心驚淒涼似羽聲一尊遽北發萬里竟西行蓬
梗人猶汎蓮花氣不平漸離高館下無處有平生

錢唐觀水漲

客行無樂事一步不如歸數日河魚上千溪石燕飛濤
青烟樹小風惡亂鴻微處處牛羊下天寒深瑾扉

鷺脰湖

西風鷺脰湖積水曠東吳岸樹微于點江天青欲無羈

腸終日遶客計一舟孤買酒三家市蕭蕭夾岸蘆

長安人日

三年長作客七日又為人旅館浮雙塔殘燈作四隣尚
寒花事淺近塞雁聲頻莫騁乘春意徒增百感新

輓盧九潤之

潤之老始作
客客而輒死

白骨藏何地新詩付落暉一生初作客匹馬不同歸人
世交游少詞場物色稀獨憐機事盡應化野鷗飛

陸氏莊二首

出門何所往，命酒即前期。驅馬翩然至，流鶯總未知。水
紫芳苑住，天與豔陽私。坐久更啼鳥，清風習習吹。
輒草堪留藉，流泉足洗杯。春餘池館在，吾戴接離來。烏
倦羣鷗狎，花遲細雨催。故侯歌舞地，歸騎總徘徊。

送陳清橋遵化司諭

可能無尺寸，虛此鬢頭花。三輔試青簡，諸生朝絳紗。剽
雲寒竹笈，邊月靜年華。長日談經處，知君擅九家。

紫闥

紫闥自生香聲華滿道傍百司方敬諾諸客又遊揚伊
呂無前軌蕭曹竟末行三光凋不盡千載樂何央

宿山家

公等領丘壑四時開茂林竹風搖壁影松月墮窗陰野
酌倨可悅病罷今已深從來松桂裏盡是古人心

送人之雷州

庾嶺去猶賒居黎半雜華山藏椰子樹溪落蒟苗花望
月應千嶂窺天自一涯微官是何物秋雨送征車

太白山上方

拂霧躋危磴披烟數亂山一松承日起羣鳥送雲還細
溜經寒澀初苔得雨斑心馳縞衣使獨此伴僧閒

山家為王員外

浚谷幽人宅中林處士家波濤上松樹歲月滿桃花童
子調黃鶴仙人養白鴉客來何所事相對飲流霞

野坐

綠水行舟處青山命酒時片雲能載日落葉自題詩山

賈朝攜婦溪漁夜就師薄言心賞洽數悞野人期

送屠田叔還閩運司

又送鹽官去南過閩海雲馬蹄上冰響鳧影及郊分候
館踈寒柝行厨少暮董惟應幔亭月遲爾白紛紛

若士

何來稱若士汎汎起清風詩卷留西派禪心近北宗花
明丹似女松老禿如翁前日天台去辛勤折數筇

苦雨二首

非旱即為潦，皇天應棄民。鴻高千里霧，魚老一江蘋。料
得禾多耳，能令巷有人。窺門猶未霽，何日可回春。
嘉穀報成西，愁霖爛作泥。山椒鳧影合，木末荇花齊。江
暗頻驕鱷，林昏屢悞雞。菜根三尺水，兼已没黃齏。

月湖秋泛

秋入涵虛館，天開衆樂亭。湖含七橋月，人聚一船星。此
地祠狂客，吾今老洞庭。獨憐雙鬢白，點破數山青。

哭楊伯翼二首

世人無達識，此道只論聲。獨好君家事，堪高我輩名。江

雲猶駐白湖水，若含情。今日脩園樹，交交聞幾鶯。

脩園
伯翼

讀書
處

道異龍分席，心同虎負荆。楊生喜任俠，末路彌縱橫。死
後詩當貴，生時世莫名。憐才自吾意，天地亦何情。

泛舟蘆頭堰

此日吾仍健，諸君一小舟。清風天上去，落日鏡中留。草
色承裾綠，荷香入座幽。飛鳧散江白，歸興滿蘆頭。

驛邸不寐

村落不知更終宵
亂鼓聲荒廚無鼠
入遠樹有雞鳴
鼾睡嗟僮僕歡言隔
友生此時正愁絕
窗月下縱橫

送吳山人治歸黃山

黃山迢遞白雲飛
黃鶴仙人拍羽歸
過雨千家榆火熟
行春一路藥苗肥
貧交落落分烟海
小隱沈沈掩畫扉
惟有當年漁獵伴
時來洒掃綠苔磯

甘露寺逢箕仲別

江南古寺舊知名江上相逢把臂行白浪在天揚子渡
綠陰如雨潤州城薜蘿寥落經年別黃鵠差池此日情
悵望隔江帆影動海天無路雁無聲

獄中劍寄徐文長

寶劍蕭蕭風雨鳴摩挲冰雪古今情不平最有人間事
欲試曾無匣裏聲土蝕青蓮文五色人言赤堇價連城
誰能掘厥寒光淨三尺猶堪萬里行

七夕送王使君

中庭坐見七襄移靈匹今宵感會離天上定言秋是夜
人間自以歲為期東南遷次空回首西北流漸忽又馳
使者不勞將石去年來杼軸更何其

訪朱邦肅不值

馬蹄無力過重閨策蹇前來問隱淪池水已冰難受月
梅花隔嶺不知春柴門倒鎖應高卧草閣斜開豈避人
酒禁近來尤甚緊從誰傾倒性情真

李山人賓甫讀騷軒和韻

梧陰片片落中庭無事閒門盡日扃春水微風吹度綠
曉山飛雨送來青從前大雅誰能作刪後離騷自一經
對爾不能辭酌酒星原是李家星

若邪溪獨往

編竹為船任所之高低白石上灘遲水波不待春生後
山色偏多雪霽時到處溪邊憐謝客誰家村裏問西施
小橋野店人爭席縹緲松烟入午炊

章村道中

雪霽雲開一徑明
花香日暖筭輿輕
野山歷歷皆人姓
春鳥交交亦自名
怪石滿溪驚駐馬
柔風吹酒忽聞鶯
種苓蒔木村村好
谷口何知有漢卿

扈從南郊紀事和朱于陳三館丈

行殿鐘聲霽曉雲
起居方罷日纔曛
貂蟬捧劍皆常侍
貌虎周廬盡北軍
絡繹中厨輸豹鬯
焯內帑出麟文
近臣尤異蒙恩澤
刺繡葳蕤五色分

扈駕祀方澤呈同行朱陳二館丈

天迴北陸攬羲軒日應南薰闢舜門泰折祥雲承玉陛
長安徽雨待金根芙蓉丹闕鸚鵡麗楊柳青樓翡翠溫
不是六龍紛氣象萬方誰識聖禧繁

莊亭

莊亭樹色曉生寒幾處扁舟欲渡難白鷺窺人雙眼碧
倉庚呼雨一衣單東來鷓鴣革浮天柱西去羊裘入釣竿
惟有酒旗青不捲月明搖櫓隔江看

揚州贈所知

雙燕何曾歸漢苑
數螢猶自照隋堤
天空月近我今到
笛短琴長人不迷
砧杵頻年思塞北
笙歌幾處憶關西
欣然道故何容易
莫厭臨風有滑稽

塞上臘日

臘日元戎出武威
西風吹角塞雲微
汗溝瀉凍膠金勒
血淚凝丸打鐵衣
明月乍逢孤雁去
驚沙還逐片蓬飛
欲尋毳帳無人說
且向南山射虎歸

雜贈

故人相見眼初明
一架薔薇似水平
花徑微聞風後狖
草堂新聽雨餘鶯
衰年久謝青藜役
愁絕能無白雪聲
把酒勸君君強飲
天涯華髮不重生

澄湖秋水練光開
乞與詩人細剪裁
小苻牽雲遊別渚
新松扶日上高臺
南風習習蒲葵卧
西月微微桂艇來
歲去如馳青鬢老
知君雙劍亦徘徊

賦得當年憶箕仲

擊水閒歌海樹蒼
東郊月吐值漁郎
青山墮影過前堰

白水迴波入斷塘宿鷺洲邊江幾曲垂虹木杪雁三行
當年勝事同誰說都付春風一慘傷

山居贈客

太平時節一閒身朝出松間拾委薪漁去忽疑空大澤
樵來還可當嘉賓野心蕩漾隨流水雲影差池落近隣
溪女能歌採蓮曲鋼刀如水削雙鱗

題鄞江先生廟

先生王姓致名君一字吾鄉有慶厯五先生為

楊先生適杜先生醇王先生說樓先生郁先生
其一也樂道安貧以行誼文章為後進師王荆
公為縣令表揚之徵秘書不赴老妻收秉稚子
拾樵晏如也廟食于郡東南里人新之予有是作
無懷藪澤一間身有道妻兒不厭貧二仲頻來相爾汝
諸生迎拜儼君臣名將太乙青藜共廟與東華老樹隣
坎坎擊鼉君至否紛紛椒糝玉為塵

觀葬者

素嬰照青燐啾啾鬼哭新園前無限地何處未來人

桃源

雞犬三家夕桑麻一葉春安知天地外別有古今人

送箕仲

微雨來過楚水前半帆斜日挂疎烟他時明月應相憶

丁卯橋邊丁卯年

山中襟詠

老樹橫溪穩作橋故人慣飲不須招白綸巾上青山好

日遣松風綠酒瓢

史相墓下作

落日低垂丞相阡
狐狸穿冢出平田
大碑已斷無文字
惟有山僧說歲年

余祭酒公五柳莊

莊中臺榭皆以歸去來詞
語命名故詩亦用陶事

貴游無事屢通書
書滿牀頭只舊題
惟有王弘粗解事
一壺相見野亭西

江湖風物醉還醒
日日山行復水行
縱是春來多脚疾

藍輿二子一門生

看潮曲

千艫萬艦逆潮來
鼈子為門鷺作堆
堤下唱歌堤上醉
看潮人待轉潮回

漢唐宋三太宗

禁裏妖星拂劍紅
寢中積雪芥聲雄
如何三讓為天子
只有西京一太宗

楊王孫

王孫家近樂游原一食纔須十萬錢
不管北邙山下路
白楊寒雨宿深烟

釣臺

落日扁舟訪釣臺青溪紅樹獨徘徊
樵夫語我江天暗
無可久留歸去來

送遠

送爾春江落照明西山遙指片雲生
也知明日當為雨
且盡今朝一日晴

送客之蜀

琵琶送酒為君彈
劍葉生霜發曉寒
似此出門猶不易
堪知蜀道古今難

送遠

江鳥如烟亦送春
江花似水逐時新
雲光雨色無非客
獨倚青山作主人

哭句章公

從此詩文失主盟
海鷗飛去不留情
可憐櫟社長橋月

曾照詩翁散髮行

僧院魂飛寄客哀
門前白馬幾人來
江村生計菜妻給
海內封書驥子開


富春江

綠轉青迴似若邪
蘭橈終日亂荷花
一江貯得春如海
合把漁竿薄漢家

題畫

中原幾度見興亡
有客登臺弔戰場
不道漁樵亦多事

坐移流水論斜陽



甬上耆舊詩卷十八